


ለናይ ሰልፍ መግርክ 60ታት

10ይ ክፋል



መሐመድ እድሪስ

መዐረከት አዳርህንጀር 9 ጃንዋሪ 1962 ከረ ሓምድ ከራር አድም ክም ትፈንተ ምኖም ያበል አተው። እለ ዶል እላመ ለመጽአት ትምጸእ ሌጠ ዐለ ፍክሮም። እት ምግብ ቢሸ ወኬሩ ሳልስ ዶል ከጥ ተለፎን እንዴ በትከው ደብር አዳርህንጀር ፈግረው ከዲቡ ተሐበዐው። እለ ህዬ ዝያደት ለትአትሻቅል ዛህረት ገብአት። እብ ጀህት ብዕደት ላኪን፡ እተዬ ባካት ክም ህለው ለትአክድ ሐብሬ ሳብተት፡ ለምን ቀዳሞም እብ ኩሉ እትጅሃት እት ክርፋሆም ክስኣም ለዐለው ዐሳክር፡ ልእከት ተሐላለፊት እቶም፡ ኦሮትከ ምነ ዐለዩ እትጅሁ አስክ በላግንደ ወደዉ ወጌማሞም ሰኒ ጸንሐ፡ እግል ሓምድ ምስል ጅማዐቱ እንዴ አጭበበው እግል ልከርዱኖም በክት ረክበው። ሓምድ፡ እግል ምሮት እተ ደብር ለረክበዎ ወድ-ድላመጅ፡ ሰላዲ እንዴ ሀበዩ ወለፍ እግል ለአምጽኣም ለአከዩ። ለሸዐቢ እግል ኢልትረኤ እብ መሐብዕት ለብእተ ገበይ ግልብ እግል ሊጊስ ሕቡሩ እት እንቱ፡ ተቃርብ ጀላብ እግል ትግበእ እሉ እብ አካን ቅልዕት ትከረ። እት ድካን እቲ ክም ቤለ ህዬ፡ ምነ ትበገስ ምነ አካን እብ ከሻፈት ታብዕዉ ለጸንሐው ዐሳክር፡ አብጠረው።

“ምን አዩ መጽአከ፡” ቤለዉ እት ለአትፋርህዉ። ለሸዐቢ ላኪን ኤማኑ ኢትሰለበ እሎም። “አነ በዐል እንሰ አነ፡ ገመል ሰበት በደ ምንዬ እሉ ሐዜ ዐልኮ።” “አዜ ምን ሎሂ ደብር ኢትከሬከ፡ ወእግል ሚ ፋግሩ ዐልከ...።” “ገመል ሰበት በደ ምንዬ፡ እት አካን ውቅል እንዴ ገብአኮ እግል ደብር ኤሊት ሰውረት ኤረትርዩ እትለ ናይ ሰልፍ መትኣምባት ግድለ ስለሕ ዲብ

60ታት ፍንጭ ምናድሊን ሰውረት ወጄሽ አባይ ገብኢ ለዐለ መግርክ ምን ምናድል ሀይለስላሴ ወልዱ ለከትበዩ ክታብ ዐዋቴ ለትነሰኣቱ። ከእግል ዮም 10ይ ክፋል አትቃምት እንዴ እቤ ቱ” ቤሎም ብዙሕ ለተዕበ እት መስል። ለዐሳክር ላኪን ኩሉ ረኣሱ እግል ልእሞኑ ኢቀድረው። ህግያሁ አማን ክም ይህሌት ሰበት ቀየመው። እተ ባካት ከበር ከረ ሓምድ ራክባም ሰበት ዐለው ምኖም ለትለኣክ እግል ልግበእ ቀድር እት ልብሎ ትሸከከው ወሰኣላት ብዙሕ ወደው ዲቡ። በሊሱ ሰበት ይአተግነዐዮም ህዩ እንዴ ፈተሸው። ዝያደት ሰኣላት ወለት-ገበይ እግል ልትሳኦሉ ለዳርኮም። ግሩሽ ወከረጢት ረክበው ምስሉ። እብሊ ህዩ ለሸኩኮም እንዴ ዜደ። “እንተ ልኡክ ሓምድ እንተ” እት ልብሎ። እብ ዝባጥ እኪት አግነሐው። እናስ ክም ትሻወጠ። ለዝባጥ እግል ልክሀሉ ኢቀድረ። ለአመ እሎም። “እግልዬ ኢትዛብጡኒ። ሓምድ ሐዜኩም ምን ገብኢ። እት ሎሂ ደብር ጊሰው። እቱ እግል ልጽነሐኩም ቱ” ቤለዮም።

ምሴ ውድቀት ጸሓይ ዐለ። ዐሳክር አባይ እብ ክልኣት እንክር እት ደብር ኡዳርህንጀር ዐሸለው። ዋርድየት ለዐለ ሀዳል ሸላል። ክርን ሰበት ሰምዐ። እቅምት ምን አበለ። አባይ እተ ስምጡ። ህቱ እንዴ ኢለሐብር። አኑር ሐጃጅ መንተብህ ወመትሸክክ ቱ ለዐለ። ለዶል ለሃመ ህሙል ሰበት ኢጸንሐ። እሰልፍ ረኣዮም። “ምድር ፖሊስ ትዘረኣው ዲቡ” እት ልብል ተሀራሀረ። ሓምድ ክል-ዶል እብ ቀደም ለመጽኡ አባይ ኢፈርህ። ህቱ ለልኣስፉ ወለኣፈርህ። እብ ግረ እንዴ ሐልፈ ለልሀግት ወዘብጥ ለፈቴሕ አባይ ቱ። “እሎም እንርእዮም ለህሌነ ሌጠ ኢኮን መጽኡነ ለህለው። ግረ አቅምቶ። ቅወት ብዕደትመ እግል ተሀሌ እሎም ትቀድር” ቤለዮም እግለ መልህያሙ ምን ሀመሌ እግል ልትደገጎ። ኢትኣከረው። ክምሰለ ለቤለዩ እብ ግራሆም መ አተው ዲቦም። ለክፍ አንበተ። ሓምድ ህዩ ከሳር እግል ኢትሳድፎም ኬን ወእንሰር እት ልትገናቤ። “ኢትትፈንጠሮ። ሕድ አትቃምቶ። እግል ሕድ ሕሰቦ። ” እት ልብል አማውሩ አስደረ። ህግያሁ ምስጢር ጸብጠት ዐለት። “ኢትትፈንጠሮ በሀለት። አንስሕቦ በሀለት ተ። ክም እሊ ተዩልል ሳድፎም እት ሀለ ለልትሀዩቦም አማውር እብ ድዱ ልተርጀብ እተ መደት ለህ። ሓምድ ዐዋቴ እግል ኖሱ እት ወዴጋይ ንኡሽ ሳትር ጸብጠ። እግል እድሪስ መሕሙድ ብለቅ እተ ዐለ ዲበ አካን ውቅል ሳትር ክም ጸብጥ ወደዩ። ክልኢቶም ህዩ። መልህያሞም እንዴ ኢልትኣዘው ጀላብ እግል ለአንስሕቦ። ረኣስ ለኢለኣረፌዕ ዘብጥ አንበተው። ክምሰለ ለሐዘዋመ ምን አባዮም ሸበህ እንዴ ሰዐው ትጄቀቀው። ዕንክለት እንዴ ተዐርረው። ገጽ ኬነ ልትሀንፈው እት ሀለው። ዐሳክር ብዕዳም ትቃበለዎም። አኑር ሐጃጅ እሰልፍ ክልኤ ጠልገት ሰበት ለክፈ ላኪን። ረኣሶም ሰበት ሐብዐው ምኖም። አስክ ዋረ

ትከረው። እብሉን ክልኤ ጠልገት ህቶም ሌጠ ኢኮን ለፈግረው። ከረ ሓምድመ እምበል ለገብኦ መታክል እብ ጅማዐቶም እግል ለዐሩ በክት ረክበው። ክሎም ሕድ እት ጋንሖ ወለዐቅቦ ህዩ እበን ወዕጨይ እት ለአትሔጉ መሳፈት ረያም ሄረረው።

ምናተ እግል ልትሐብዖ ኢቀድረው። እብ ሐዲስ መናዱቅ እንዴ ዐመረው ስጋደት እት ፈግሮ፡ ብዕዳም ዐሳክር ከርፈዎም ወፈነጥር ገብአው። እሰልፍ ዙብጥ ለጠለቀው ፖሊስ ዐለው። እተ ዶላ ለኢትምሕክ ጠልገት ለዙብጠቱ እብራሂም መሐመድ ሰኒ (ወድ ዐድ-ኩሉ) እንዴ ኢልትፋኔ እታሁ አስተሸሀደ። እብራሂም ክም አስተሸሀደ፡ ሕኔት ሕድ እት ተዐቅብ ተአንስሕብ፡ ኦሮትክ ዐደድ ሓለቱ ተረግ እብ ሰከይ ቤለ። ፖሊስ መዐነውያት ሰበት ረክበው “ጽብጡ! ጽብጡ” እት ልትበሀሎ፡ ደርቦም ሰዐው። ርኤኒ-ርኤኒ እት ልብሎ ለክፈው እቶም። እድሪስ መሕሙድ እት አኬነት ውቅል ፈግር ክም ረአዉ ምነ ጠለቀዉ እቱ መጃሚዕ ጥለግ፡ ጠልገት ሐቴ መጽወርላ ራፍዐ ለዐለ ሸንጠት ጠግ አበለት ምኑ። ህቱዲ ሐቴመ ኢገብአ። ታክለቱ ለዐለት ሸንጠት ላኪን ምነ መሸንገሉ አርድ ሸወጠት። እንዴ ሐድገዩ ገበዩ እግል ልጭረም ምነ ሐዘ፡ ላኪን ጥለግ ሰበት ዐለ ዲበ ኤማን እንዴ ወደ እግል ልሕደገ ኢሐዘ። ትወለበ ዲበ ከእንዴ ሸትፊዩ እብ ሰዐይ ድማን ወድገለብ እት ለሀጽፍ እበ፡ ገበይ-ፈጊሩ አተላለ። እት አስዕር ዎሮት ሰበት ትሸረበ ህዩ ምን አባይ ተሐበዐ። እላመ ለትአትፋግሩ ኢዐለት። እግል ልድሐን ገብኦ ምን ገብኦ፡ እት ስጋደት ብዕደት መዐደይ ኬን እግል ልትዐዴ ዐለት እሉ። እብ ኤማን እብ ሸፋግ እት ልስዔ አስክ ስጋደት ሐቴ ትወጀህ። እተ ዶል ሰልፍ ሰበት አትሀመለዮም ኢረአዉ። እተ ርሸመትላ ዕንክለት ክምፈግረ ላኪን፡ እብ ተማሙ ሰበት ትረአዮም፡ አስክ ብሬን ለብእቱ ጥለግ ብዙሕ ከሸሐው እቱ። ጥለግ ለሃበጠዩ ነፊፍር እበን እት ገሮቡ ትዘረአ። ምን ገሮቡ አድማይ ልትክዔ ምንመ ዐለ፡ ብሩድ እት እንቱ ዙብጡ ሰበት ዐለ፡ አዘ ብዙሕ ኢወደ እቱ። ሕጽሕጽ ቱ ዛብጡ ለዐለ። ምኖም ሰኒ ክም አሬመ፡ ግድም ለልዐሬኒ አለቡ እንዴ ቤለ ክም አተድሐነ፡ እግል ልትነቀብ ለመስለ እቱ ፈለልም እበን እብ መንቀብ አትፋገረዮ ምኑ። ሓምድ በይኑ ጀፈር ጀፈር ልትሓዜ፡ ህቱመ ምነ ከርዶን እግል ልድሐን ላዝም መወቀል እንዴ ፈግረ ገጹ ኬን እግል ልትሀንፌ ምኖም ወጀቡ ዐለ።

ህቱመ ዐሳክር ሰበት ረአዉ ጥለግ ከሸሐው ዲቡ። ኢትሰሐታመ። ገሌ ክፋል ገሮቡ እብ ደም ትጀልገደ። እዴ ገለቡ እንዴ ትዘበጠት እት ትትሀንበል ምኑ ሸዐረ እበ። ለምጅርሑ እብ ሸልቱት እንዴ አስረዩ ነዚፍ እግል ለአብጥር ምናመ ኢቀድረ። ምናተ እታሁ ኢበጥረ። ክምሰል ትጀረሐ

ለአመረው ዐሳክር፡ “ኢትልከፍ! ጽበጡ፡ ጽበጡ፡ ነዐ!” እት ልትበሀሎ፡ ህቱ ጽረት መንዱቁ ስእን እት እንቱ፡ ገጹ ቀደም ጌሰ። እት ገይስ ህዬ እግል አኑር ሐጃጅ ዐረ እቡ። ጥለግ ህዬ ድማኖም ወድገለቦም ቱ ልትሓነን ወእተ ስምጥ እገርም ዘብጥ ከለኢታንን፡ እብ ረአሶም ወስምጦም ልትሓለፍ። በጥረው ምን ገብእ እግል ኢሊሙቶ ሰበት ፈርሀው፡ ሰዐዮም አተላለው። አኑር እት መሬሕ ወሓምድ እት ተሌ ሰኩ እት ህለው፡ አኑር እት አሸዋክ ሰበት አተ፡ እደዩ ተሐናዘገ ምኑ ከደም ጀረፍ ለአብል ዐለ። ህቱ ኖሱ ለትጀረሐ ሰበት መስለ እቱ፡ እግለ ቀደሚህም ለዐለ እድሪስ ክም ረአ፡ “እድሪስ፡ እድሪስ ነዐ ኢትሕደገን፡ ሓምድ ወአነ ክልኢትነ ጅርሓም ህሌን” ቤለ ከነቅመዩ። ሐቆህ ላኪን ኢትረአዮም፡ ምኖም እንዴ ትፈንተ እተዩ ክም አለወጠ ኢትአመረ። “ለዐሳክር እት ሓምድ ዲብ ልሸእጎ ክም መጽአው፡ መሰደሱ ዐመረ። እግል ለዐሩ እቡ ቅሩባዩ ክም በጽሐው፡ ህቱመ እግል እድሪስ ረአዩ። “ጅሮሕ ህሌኮ” እት ልብል እት ለሐብሩ፡ እግል ኢልሕደጉ ወተቅጥዩት ለክፍ እግል ሊዴ እሉ አሸረ እሉ። እድሪስ ድንግጽ ቤለ ከዲቡ እግል ለአቅብል ክም ሐዘ፡ እብ ቅራር ወድቀ። ኢትአዘ ወላመ ውድቀት ይአኬት፡ እብ ሰበተ ደሐነ።

እባህ ህዬ እግለ ቅራር ክም ሳትር እንዴ ትነፈዐ እቡ መንዱቁ እንዴ ወጀህ፡ እግለ እግል ለዐርዮም ልሰዔ ለዐለ ዐስከሪ ቅርድ እዘኑ ህፍተ እቱ። ክምሰለ ጠሊት እት ልንእር ገጹ ግረ ተንቀለ። ሐቆ እሊ ዐሳክር ሰዐዮም ሸበህ እንዴ በርደው ምኑ፡ “ረክበዩ! ረክበዩ!” ትበሀለው ከለዋድቅ ዐለ መልህዮም እግል ልርድአ ጌሰው። እግል ኖሳመ ጸሓይ እንዴ ወድቀት ምድር ሰበት ዐወድወደ፡ ለመዕረክት በጥረት ወግረፈት። ሓምድ እግል እድሪስ መሕሙድ ወእግለ እተ ባካቱ ለዐለ ኣድም አብሐሊመ፡ “ተሐት እንዴ ትከሬኩም ጽንሐኒ” ቤለዮም ከእግል ለአትቃምት አንበተ። ህቶምመ ክምለ እለ ትበሀለው ተሐት እንዴ ትከረው፡ እተ ለሐብዖም እበን እንዴ ትጋሰው ልታከወ እት ህለው፡ ሓምድ ምን ገበዩ ሰበት ሸክፈ ሐልፈዮም ከትከረ ወዲብ ሕጽርት ለዐለት ገርህት አተ። እትለ ገርህት ምስል ኦሮት ከማል ለልቡሉ እት ወድኑ እክሉ ወቄዕ ለዐለ ሸበሊ ወድ አልገዴን ትዋጅህ።

ከማል ምስል ዕያሉ ረአስ ገርህቱ ኣቲ ዐለ። ጅሮሕ ክም ረአዩ ሰኒ አርሐመዩ። እተ ዶሉ ጠሊት እንዴ ሐርደ እሉ፡ ማይ እት ሀወት እንዴ ወደ፡ እግል ሓምድ እት አድግ ጸዐዩ፡ ከአዳም እንዴ ኢልርእዩ እተ ላሊህ አስክ ደብር ኤሊት ብልቱብያይ ፈግረ እቡ። አርበዕ ምዕል ጸልዐቱ እት ሰፍፍ እሉ ራዐዩ። ግንድፍል ወወድ እድሪስ ዐሊ በኪት ለልትበህል ምን በዲሮም ጦፍ ልእካሞም ሰበት ጸንሐው፡ አስክ አካኖም እት ለአቀብሎ፡

መዐረከት አዳርህንጀር እንብትት ጸንሐቶም። እንዴ ኢደሉ ህዩ እተ ምግብለ መዐረከት አትያም ዐለው። መንዱቅ ግንድፍል ለስጡር አፋሁ ዐለ። ለዎሮት ህዩ እዴሁ እብ ብራቀ በትራይ። እብሊ ሰበ እሊ፡ ለመዐረከት ክም አስተብዴት ምነ ዐለ እተ አካን ተወዝ ኢወደው። ዐሳክር አባይ እግለ መልህያሞም እግል ለሃጅሞ ስጋደት ክም አተንከበው፡ ገጸም ግረ ሰከው። ሐቆህ ምስልመ ይሄረረው ትፈናተው። ግንድፍል እግል ሐምድ ምስል ከማል ረክብ እት ሀለ፡ ለህይ ህዩ እባሁ በደ።